

Durante ejercicio militar a keda declara

Bushi ta bon defensa pa Aruba

ORANJESTAD(AAN)— Ora vehiculonan militar pasa ariba nan, e vehiculonan ta topa cu sumpiña cu ta bora tirenan. Bushi ta forma un bon defensa pa Aruba, un funcionario alto di e grupo di militar Americano cu ta na Aruba a bisa, comparando un que otro cu Vietnam. Loke talbez e no a comprende ta, cu na Aruba probablemente un invasion lo no bay acompaña pa vehiculonan militar pa trapa ariba bushi.

E siman aki hopi atencion tabata dirigi na e ejercicio militar High Quality. DIARIO a sigui e ejercicio nan di acerca y por a papia tambe cu funcionarionan cu tabata duna mas informacion.

Por a nota cu e militarnan Americano tabata conta cu armanan sofisticada, pero cu nan tabata den un posicion desventajoso compara cu nan colega nan di Aruba y di Antillas, cu tabata mas conoci cu e tereno. Asina mas soldado Americano a haya nan mes ta worde trata pa sumpiña den pia, ora nan a trapa den bushi.

Tambe tabata tin militar cu a dal pega den cadushi durante e ejercicio, ora flora di Aruba a haya basta atencion.

Asina un alto funcionario di e unidad militar di Merca a duna di conoce, cu bushi ta forma un aspecto importante pa e defensa di Aruba. Esaki pa motibo cu vehiculo-

nan militar, cu no conoce e tereno, ta pasa ariba bushi y ta worde confronta cu flat tire, cu tur consecuencia cu esaki ta trece cune.

El a mustra cu tempo di guerra na Vietnam mester a tira for di avionnan, material especial pa proteha e tirenan di vehiculonan militar for di bushi.

Mientras bushi ya tabata forma un problema pa e unidad Americano, nan no tabata conoce e situacion mes bon cu e unidadnan estaciona na Antillas y na Aruba. E vehiculonan di Marina Real Hulandes ademá tabata move mas rapido cu esnan di e Americanonan, ya cu nan tabata transporta menos material y tabata tin e cargamento mas pisa den un jeep especial.

Na diferente sitio a realiza atakenan den cuadro di e ejercicio, cu ta termina awe pa despues por worde evalua.

Mientrastanto Aruba por a conoce un situacion diferente, cu hende ta hunga guerra, haciendo uso di bomnan di huma y di luz pa asina por tuma nota unda e enemigo ta scondi.

Luz tabata necesario tambe pa e militarnan mes mira unda nan tabata move, ya cu scuridad a forma un problema.


Aruba a conoce un ejercicio importante, cu pa esnan cu por a observe sabiendo cu tabata un ejercicio, tabata algo netamente interesante.



Teniente Quandt y Teniente Corol de Koning, ambos Arubiano cu funcion basta alto den Marina Real, ta topa cu otro durante ejercicio High Quality.



Milicia di Aruba ta sigui e movecionnan di e "unidadnan enemigo" di acerca....



Un grupo di militarnan Americano y di Marina Real Hulandes ta observa e escena cu a desaroya su mes durante e ejercicio....



Despues di a lanza un bom di huma, un grupo di soldado ta aprobecha di e ocasion pa nan avanza....